

SESIÓN EXTRAORDINARIA E URXENTE CELEBRADA POLO PLENO DO CONCELLO O DÍA
2 - ABRIL - 2009

ORDE DO DÍA

- 1.- RATIFICACIÓN DA URXENCIA DA PRESENTE CONVOCATORIA.
- 2.- ADOPCIÓN DE ACORDOS EN RELACIÓN COAS OBRAS DO PROXECTO "ABASTECIMENTO DE AUGA A CABANAS, COTAREL E FORMIGA" (OH.236.869).

Na Casa do Concello de Redondela, sendo as nove horas do día dous de abril de dous mil nove, baixo a Presidencia do Sr. Alcalde, D. XAIME REI BARREIRO e a asistencia dos/as Sres./as Concelleiros/as: D. EDUARDO JOSÉ REGUERA OCAMPO, D. EMILIO GONZÁLEZ IGLESIAS, D^a. LAURA LAGO ALLER, D^a. MARIA ALBINA REBOREDO SURIS, D. MANUEL IGLESIAS CARRERA, D. CARLOS GONZÁLEZ FERNÁNDEZ, D^a. ISABEL CASTRO PIEDRAS, D^a. FRANCISCA CANAL GÓMEZ, D. JUAN TIZÓN CABALEIRO, D. JOSÉ ALBERTO PAZOS COUÑAGO, D. MIGUEL ANGEL ALVAREZ BALLESTEROS, D^a. HERMINDA QUELLE FERNÁNDEZ, D. CÁNDIDO VILABOA FIGUEROA, D^a. LAURA ALONSO GÓMEZ, D. XOSÉ CARLOS PAZOS DOCAMPO, D^a. MARÍA ANXELES BABARRO FERNÁNDEZ, e D^a. ROSA MARIA COSTAS ESTÉVEZ, tamén asistiu o Sra. Interventora Xeral do Concello D^a. AGUEDA BELLO VALDÉS, actuando como Secretaria a Secretaria Xeral da Corporación DONA. ANA BEGOÑA MERINO GIL, constitúese o Pleno do Concello, en sesión extraordinaria e urxente, conforme á convocatoria e de acordo coa Orde do Día.

Non asisten, excusando a súa ausencia, os/as Sres./as Concelleiros/as DONA. MARIA LORENA LÓPEZ RODRÍGUEZ, D. ALEJANDRO BASTOS FERNÁNDEZ, e D. BENIGNO GARCÍA-LUENGO MONTERO.

INCIDENCIAS.-

Con carácter previo no tratamento dos asuntos incluídos na Orde do Día, a Corporación garda un minuto de silencio en lembranza das vítimas da violencia de xénero.-

A Presidencia declara aberta a sesión, en primeira convocatoria, procedéndose a trata-los puntos da Orde do Día.-

1.- RATIFICACIÓN DA URXENCIA DA PRESENTE CONVOCATORIA.-

Sometida a ratificación a urxencia da convocatoria, a concelleira señora Canal Gómez indica que non é coherente convocar o pleno deste xeito, xa que o expediente xa levaba bastante tempo no Concello e non ten lóxica que o gardaran nun caixón e agora pretendan que o miren nunhas poucas horas. Parécelle unha vergoña e considera que posto que o escrito da Xunta de Galicia fala da financiación do 85%, pero agora propónse solicitar o 100%, se faga así co acordo de todos os grupos e se agarde a que a Xunta responda a esta solicitude.

O Concello Pleno, en votación ordinaria e por maioría dos/as Sres./as concelleiros/as asistentes, sendo once votos a favor (8 do PSdeG-PSOE e 3 do BNG) e sete votos en contra (7 do PP), ratificouse a urxencia da presente convocatoria.-



NUMERADO
ORACIONS
OCAIS



(Selo da Corporación)

(Sinatura do Presidente)

Folio N.º

Serie A N.º 2237072

2.- ADOPCIÓN DE ACORDOS EN RELACIÓN COAS OBRAS DO PROXECTO
"ABASTECIMENTO DE AUGA A CABANAS, COTAREL E FORMIGA" (OH.236.869).-

ANTECEDENTES.-

Proposta do Concelleiro Delegado de Medio Ambiente de data 1 de abril de 2009, que transcrita dí:

"ASUNTO: Documentación solicitada por Augas de Galicia para execución das obras do proxecto "ABASTECIMENTO DE AUGA A CABANAS, COTAREL E FORMIGA." (OH.236.869).

Emitidos os correspondentes informes polo Arquitecto Municipal (17.12.08) e Interventora Municipal (19.12.08), e no cumprimento do esixido polo organismo Augas de Galicia no seu escrito con rexistro de entrada nº 9576, do 13.10.08, propónse ao Concello Pleno a adopción do seguinte acordo:

1. Aprobar o proxecto de referencia.
2. Solicitar da Presidencia do Organismo Autónomo de Augas de Galicia o financiamento do 100% do custo das obras.
3. Poñer a disposición da Administración Hidráulica de Galicia os terreos e auga necesarios, libres de cargas e gravames, para a execución das obras, así como todas as autorizacións administrativas para a realización destas.
4. Renunciar expresamente á retención de calquera tipo de taxa, canon ou imposto de carácter local con motivo das obras.
5. Procecer á realización da correspondente exposición pública do proxecto durante un prazo de 20 días.
6. Comprometerse a asumir a explotación, mantemento e conservación das obras e de efectuar os traballos necesarios ordenados pola inspección facultativa despois da súa execución.
7. Comprometerse a actualizar as tarifas pola prestación do servizo na medida axeitada ao custo das obras que se realizan, e a súa explotación e amortización, de acordo coas consideracións establecidas expresamente no escrito de Augas de Galicia arriba citado (nº 9576 de rexistro de entrada).
8. Facultar ao Concelleiro Delegado de Medio Ambiente, no uso da delegación xenérica da Alcaldía de 11.07.07, para solicitar o financiamento do 100% do orzamento das obras.

Por causa da urxencia da remisión do acordo plenario que se adopte a Augas de Galicia darase conta do mesmo á Comisión Informativa de Medio Ambiente na primeira sesión que celebre, ao abeiro do establecido no artigo 126.2 do RD 2568/1986, do 28 de novembro."

INTERVENCIÓNS.

O concelleiro señor Pazos Docampo dí que teñen o compromiso verbal da Xunta de Galicia de que a financiación sí vai a ser do 100% do proxecto.

O concelleiro señor Pazos Couñago sinala que efectivamente lles parece unha obra importante e urxente, pero indica que a Xunta de Galicia pediu a documentación o 13 de outubro do pasado ano e agora queren que tomen unha decisión con menos de 24 horas de antelación. Estima que se non é ilegal é inmoral e lle parece que ao goberno lle ten que cair a cara de vergonza considerando que o último documento do expediente é o informe de Intervención do 19 de decembro. Pregúntase que é o que fixeron nos últimos meses con respecto a este tema, especialmente tendo en conta que hai tres meses preguntaron por este proxecto e se lles dixo que non sabían nada. Tamén dí que solicitaron un informe no mes de febreiro e non se lles contestou, aínda que supón que o informe se fixo. Por outra banda considera que se agora se aproba o proxecto, neste intre se están a realizar unhas obras sen proxecto. Pensa que as obras que son esenciais, como esta, deben ser apoiadas por todos, pero tendo todos os elementos de xuízo e despois de estudialas axeitadamente e

consensualas cos veciños. Descoñece por qué agora o tema é urxente e non o era hai dous plenos, cando pediron explicacións ao respecto.

O concelleiro señor González Iglesias dí que sen lugar a dúbidas o asunto é urxente posto que, aínda que o Concello xa tiña o proxecto, como outros moitos, tivo que facer xestións para a súa financiación e non obtiveron resultados ata estes últimos días. Parécelle que é unha obra imprescindible para os veciños da zona dado que é preciso estender a rede de abastecemento municipal a fin de que non sigan a sufrir cortes de auga no verán. Sorpréndelle a proposta do PP de solicitar o 100% da financiación cando iso é precisamente o que consta na proposta que se somete ao Pleno. Pensa que o PP mira todo dende unha perspectiva partidista, son os concelleiros das plataformas e non teñen perspectiva a medio prazo. Con ese criterio, Redondela carecería de infraestruturas.

O concelleiro señor Pazos Docampo sinala que con isto resólvese un problema importante dunha zona do municipio e con visión de futuro. Non lle parece de recibo que se opoñan á obra porque teñan discrepancias en canto a cuestións de forma e sinala que a pregunta que prantexaron no pleno referíase a unhas obras de acometida para a Autoridade Portuaria de Vigo, que non ten que ver co proxecto que agora se vai a aprobar e, aparte, cumpriron escrupulosamente o que sinalou o informe de secretaría. Parécelle que non se deben mesturar as cousas porque o proxecto leva tres anos xestándose e admite que agora vai con presa, pero ata onde non foi posíbel perfeccionar toda a documentación do expediente, pero que todos os expedientes están a disposición dos grupos municipais por se queren miralos.

O concelleiro señor Pazos Couñago dí que non ten dúbidas de que o pleno sexa ilegal e reitera a súa pregunta de, qué fixeron nestes tres meses se o último documento do expediente é do 19 de decembro?.

O señor Alcalde dí que hai cousas que tardan en resolverse, sobre todo cando hai que facer xestións ante outros organismos e a partir de aí ponse a maquinaria en marcha. Sinala que o importante é a obra e que se sufrague na súa totalidade pola Xunta, aínda que haxa cousas que políticamente non lle conveña explicar, cousa que sempre pasa. De feito neste caso non se deu o visto e prace ata o venres pasado e o que menos se lles ocorreu foi pensar nos concelleiros do PP.

O concelleiro señor Pazos Couñago dí que non ve por qué hai tanta presa, xa que Augas de Galicia non lle puxo ningún prazo. Tamén dí que o señor Pazos recoñece que si hai un informe e que cumpriron o que indica, pero sinala que non entende porque o mesmo non o ten cando foi el quen o solicitou.

O señor Alcalde indícalle que llo trasladará, dado que o informe o ten el.

O concelleiro señor Pazos Couñago dí que non nega que a obra sexa importante e por iso hai que ter máis escrúpulos ao falar do tema e á hora de dar só 19 horas para que se estude o expediente. Pensa se as presas terán algo que ver coa toma de posesión do novo goberno.

O señor Alcalde dí que está convencido de que o próximo goberno vai ter sentido común, pero sabe que mentres se nomeen todos os cargos a cousa pode alongarse ata despois do verán, polo que sería tonto e negligente non resolver agora a cuestión, considerando que é legal e que a Consellería está de acordo.

O concelleiro señor Pazos Couñago lembra que non é convinte que o señor Alcalde interveña como portavoz, respostándolle este que simplemente o fai por aclararlle as cousas. O concelleiro segue a dicir que para votar a favor do proxecto precisarían non só que o proxecto sexa beneficioso, senón tamén que poidan estudalo, cousa que non puideron facer e non están dispostos a votar nada en 24 horas. Non entende como dí que hai concelleiros do PP nas plataformas, posto que non é certo e máis ben hai ex-concelleiros dos grupos de goberno e dí que non é de recibo que se fagan obras en licenza ou sen proxecto, e que nese intre o concelleiro de medio ambiente afirmou que as obras que se estaban a realizar coincidían en parte coas que están neste proxecto. Parécelle que a proposta é un exercicio de oportunismo político porque non lle van a dar o 100%, o tema vai vir de volta e logo dirán que é por culpa da Xunta.